

40

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
APR 29 1940

T 3148/O. 82



山西通志卷第八十七

山西巡撫都察院右副都御史臣覺羅石麟奉

旨修輯

名宦五

太原府

周

知徐吾知盈孫魏獻子以為涂水大夫謂徐吾餘子之不失職能守業者也

賈辛晉人敬王初從籍談荀躒定王子朝之亂魏獻子以為祁大夫

魏戊獻子庶子獻子為政謂戊不失職能守業以為梗陽大夫謂成鱣吾與戊也縣人其以我為黨乎對曰戊之為人

哈佛大學漢和圖書館珍藏印



也遠不忘君近不偪同見利思義在約思純有守心而無淫心雖與之縣不亦宜乎

司馬督字烏王子朝亂督從籍談荀躒帥師定之魏獻子以爲平陵大夫

董安于晉人爲趙氏臣荀寅范吉射之亂安于告趙孟先備之簡子奔晉陽時安于力戰敗二氏梁嬰父惡之謂知文子曰不殺安于使終爲政于趙氏必得晉國乃使告于趙孟討始亂趙孟患之安于曰我死而晉國寧趙氏定將焉用生人誰不死吾死莫矣乃縊而死知伯從趙孟盟而後趙氏定祀安于於廟初安于爲趙氏治晉陽公宮之垣皆以荻蒿苫楚檜之高至丈餘室皆鍊銅爲柱質後智伯率韓魏伐趙襄子適晉陽發而用之三國之兵乘城而戰三

月不能拔卒敗智伯軍而禽之國語下邑之役董安于多趙簡子賞之辭固賞之對曰方臣之少也進秉筆贊爲名命稱於前世義於諸侯而主弗志及臣之壯也耆其股肱以從司馬苛慝不產及臣之長也端委鞞帶以隨宰人民無二心今臣一旦爲狂疾而曰必賞女是以狂疾賞也不如亡趨而出乃釋之

尹鐸趙氏臣簡子使爲晉陽請曰以爲繭絲乎抑爲保障乎簡子曰保障哉鐸損其戶數簡子誠襄子曰晉國有難而無以尹鐸爲少無以晉陽爲遠必以爲歸及智伯率韓魏伐趙襄子與張談定所適曰晉陽先主之所屬也尹鐸之所寬也民必和矣乃走晉陽晉師圍而灌之沈竈產鼃民無畔意始趙簡子使鐸爲晉陽曰必墮其壘培吾將往焉



若見壘培是見寅與吉射也鐸往而增之簡子如晉陽見壘怒曰必殺鐸也而後入大夫辭之不可曰是昭余讐也郵無正進曰昔先主文子少釁于難從姬氏於公宮有孝德以出在公族有恭德以升在位有武德以羞爲正卿有溫德以成其名譽失趙氏之典刑而去其師保基於其身以克復其所及景子長於公室未及教訓而嗣立矣亦能纂修其身以受先業無謗於國順德以教子擇言以教子擇師保以相子今吾子嗣位有文之典刑有景之教訓重之以師保加之以父兄子皆疏之以及此難夫尹鐸曰思樂而喜思難而懼人之道也委土可以爲師保吾何爲而不增是以修之庶曰可以鑑而鳩趙宗乎若罰之是罰善也罰善必賞惡臣何望矣簡子說曰微子吾幾不爲人矣

以免難之賞賞鐸初伯樂與鐸有怨以其賞如伯樂氏曰子免吾死敢不歸祿辭曰吾爲主圖非爲子也怨自若焉大戊午趙成侯三年爲相伐魏取鄉邑七十三及肅侯十六年游大陵出於鹿門大戊午扣馬曰耕事方急一日不作百日不食肅侯下車謝

漢 郟辛魏大夫說苑魏太子語經侯郟辛治晉陽而道不拾遺

蕭由字子驕東海蘭陵人望之子也舉賢良遷太原都尉治有聲多稱薦者元始中爲中散大夫終官

郭伋字細侯扶風茂陵人高祖父解伋少有志行王莽時爲并州牧更始素聞伋名徵拜左馮翊建武十一年省朔方刺史屬并州帝以盧芳據北土乃調伋爲并州牧過京師



謝恩帝卽引見并召皇太子諸王宴語終日賞賜車馬衣服什物伋前在并州素結恩德及後入界所到縣邑老幼相携逢迎道路所過問民疾苦聘求耆德雄俊設几杖之禮朝夕與參政事始至行部到西河美稷有童兒數百各騎竹馬道次迎拜伋問兒曹何自遠來對曰聞使君到喜故來奉迎伋辭謝之及事訖諸兒復送至郭外問使君何日當還伋謂別駕從事計日當告之行部旣還先期一日伋爲違信於諸兒遂止於野亭須期乃入是時朝廷多舉伋可爲大司空帝以并部尙有盧芳之儆且塞北未安欲使久於其事故不召伋知盧芳夙賊難卒以力制常嚴烽候明購賞以結寇心芳將隨昱遂謀脅芳降伋乃亡入塞北伋以老病上書乞骸骨二十二年徵爲大中大夫明

年卒時年八十六

弓里戍爲騎都尉建武二年將兵平定北州到太原歷訪英俊大人問以策謀戍見溫序奇之上疏薦焉序後遷護羌校尉死義於隗囂當時以戍爲知人

郭丹字少卿南陽穰人更始時舉賢能建武十三年大司馬吳漢辟舉高第再遷并州牧有清平稱轉使匈奴中郎將永平三年爲司徒免卒年八十七

馮衍字敬通野王之孫幼有奇才王莽時諸公多薦舉之衍辭不仕著顯志賦以自勵後仕爲陽曲令建武六年日食衍上書陳八事帝將召見衆共排之遂得罪西歸故郡

劉瓚字文理平原人遷太原太守郡有豪強中官親戚爲百姓所患瓚深疾之到官收其魁帥殺之所藏匿主人悉坐



伏誅桓帝徵詣廷尉以瓚宗室不忍致之於刑使自殺  
鄧訓字平叔新野人禹少子也少有大志樂施下士永平中  
理滹沱石臼河從都慮至羊腸倉欲令通漕太原吏人苦  
役連年無成轉運所經三百九十隘前後沒溺死者不可  
勝算建初三年拜訓謁者使監領其事訓考量隱括知大  
功難立具以上言肅宗從之遂罷其役更用驢輦歲省費  
億萬計全活徒士數千人屢有邊功卒於張掖太守元興  
元年和帝以訓后父使謁者持節至訓墓賜策追封諡曰  
平壽敬侯

蘇章字孺文扶風平陵人少博學能屬文安帝時應舉賢良  
方正對策高第爲議郎順帝時遷冀州刺史換爲并州刺  
史以摧折權豪忤旨坐免隱身鄉里不交當世卒于家

胡芳爲并州刺史度遼將軍皇甫規欲退身避第數上病不  
見聽會上郡太守王旻喪還規縞素越界到下亭迎之因  
令客密告芳言規擅遠軍營公違禁憲當急舉奏芳曰威  
明欲避第仕塗故激發我耳吾當爲朝廷愛才何能中此  
子計耶遂無所問

宋果字仲乙扶風人性輕悍喜與人報仇爲郡縣所疾郭林  
宗乃訓之義方舉以禍敗果感悔遂改節自飭後以烈氣  
聞辟公府侍御史并州刺史所在能化

鄧盛爲并州刺史郡人路佛少無名行而太原太守王球召  
以補吏郡吏王允固爭球欲殺允盛聞之馳傳辟允爲別  
駕從事允由是知名而路佛以之廢棄

趙岐字邠卿京兆長陵人少明經有才藝仕州郡以廉直疾



惡見憚舉理劇爲皮氏長抑強討奸大興學校會河東太守劉祐去郡而以中常侍左悺兄勝代之岐耻疾宦官卽日西歸後南部烏桓鮮卑畔公卿舉岐擢拜并州刺史岐欲奏守邊之策未及上會坐黨事因撰次以爲禦寇論又是時綱維不攝閹豎專權嘗擬前代連珠之書四十章上之留中不出而岐遂遭黨錮去建安六年卒著孟子章句三輔決錄傳於時

鄭昌字次卿泰山剛人弟弘字穉卿亦好學皆明經通法律政事次卿爲太原太守弘爲南陽太守皆著治蹟條教法度爲後所述

臧旻臧洪父也有幹才達於政爲漢良吏初爲徐州從事辟司徒府爲盧奴令冀州牧舉尤異遷揚州刺史丹陽太守

轉拜長水校尉終太原太守所在有名

晉

荀藐或云浪武帝時爲榆次令爲政以德懷民時鳳集其境武帝下詔褒美云就之如日月敬之如神明愛之如父母樂之如時雨今縣南有荀政鄉藐去民思之故云

劉暉字長升東萊掖人毅子正直有父風爲侍御史劾司徒王渾郭彰嘗曰我能截君角暉勃然曰天子法官而欲截角乎求紙筆奏之彰不敢言遷太原內史趙王倫之亂假征虜將軍不受與三王共舉義倫誅入爲左丞終右光祿大夫太子少傅散騎常侍後勸王彌曹嶷歸正遇害

王陟永興二年任嵐州牧時劉淵稱帝將攻嵐石等州劉琨與陟約拒寇陟曰公不負朝廷陟敢負公哉協力守禦卒



賴保全後陟既遷其地乃陷

北魏

元延爲并州刺史道武皇始二年并州守將封真率其種族與徒河爲逆將攻延延討平之

樓伏連代人忠厚有器量從征姚平於柴壁以功賜爵安邑侯爲晉兵將軍并州刺史招誘西河曹成等七十餘人襲殺吐京護軍及其守士三百餘人并擒叛逆阿度支等二百餘家太宗嘉之拜成等將軍賜爵列侯後晉爵廣陵王薨諡恭

辛祥字萬福隴西狄道人紹光之孫也舉司州秀才太傅元丕爲并州刺史祥爲府屬敕行建興郡轉并州平北府司馬會刺史喪朝廷以其公清遂越長史敕行州事祥初在

司馬有白壁還兵藥道顯被誣爲賊官屬推處咸以爲然祥曰道顯面有悲色察獄以色其此之謂乎苦執申之月餘別獲真賊後除郢華二州長史卒

荀狐爲并州刺史不治產死之日家無餘財百姓追思之孫小字茂翹咸陽石安人夏時没入宮刑魏平統萬徙平城

以聰識有智略稱屢著戰功賜爵泥陽子出爲冠軍將軍并州刺史晉爵中都侯州內四郡百餘人詣闕頌其政化小嘗重郭祚門才以祚爲主簿兼任之以書記時人多之韋孝寬字叔裕杜陵人以王思政薦爲并州刺史鎮玉壁兼攝南汾州事高歡以大衆來攻連營數十里盡攻擊之術孝寬拒破之歡智力俱困因發疾夜遁去軍中訛言丞相中弩死歡聞勉坐見諸貴使斛律金作勅勒之歌自和之



哀感流涕西魏帝嘉孝寬功授驃騎大將軍進爵建忠郡公

北齊

李稚廉趙郡高邑人少而寡欲初不從家人有所求請嘗故以金寶授之終不取強付輒擲之於地州牧以其蒙稚而廉故名曰稚廉天平中高祖擢爲泰州開府長史平北將軍稚廉緝諧將士軍民樂悅高祖頻幸河東大相歎賞世宗嗣事除霸府掾謂杜弼曰并州王者之基須好長史各舉所知時稚有所稱皆不允衆人未答世宗乃謂陳元康曰我教君好長史處李稚廉卽其人也遂命爲并州長史常在世宗第內與隴西辛術等六人號爲館客待以上賓之禮天保初除安南將軍太原郡守天統中爲并省都官

尚書武平五年三月卒於晉陽贈吏部尚書

王晞字叔朗北海劇人六世祖猛家於華山之鄜城晞淹雅有器度好學不倦隨神武到晉陽補中外府功曹參軍帶常山王演友齊天保初行太原郡事濟南立常山王從駕除晞并州長史王還并除丞相府司馬晞性閒淡寡慾雖王事鞅掌而稚操不移在并州戎馬填闕未嘗以世務爲累良辰美景嘯咏遨遊登臨山水以談讌爲事人士謂之物外司馬嘗詣晉祠賦詩忽有相王使召晞不時至後仕至儀同三司隋初卒於洛陽

蘇瓊字珍之武強人文襄以儀同開府引爲刑獄參軍每加勉勞并州嘗有彊盜長流參軍推其事所疑賊並已拷伏失物家並識認唯不獲盜賊文襄付瓊更令窮審乃別推



山西通志 卷八十一  
得元景融等十餘人並獲賊驗文襄大笑語前安引賊者  
曰爾輩若不遇我好參軍幾致枉死累遷南清河太守循  
聲尤著仕至大理卿卒於周

隋

辛公義狄道人開皇中爲并州刺史下車先至獄中露坐驗  
問獄囚十餘日斷決殆盡方還受訟皆不立文案訊問不  
盡應須禁者公義卽宿廳事或諫曰君何自苦也答曰刺  
史無德令百姓繫於囹圄豈有禁人在獄而心自安乎罪  
人聞之咸自嘆服後訟者多兩讓而止

長孫行布河南洛陽人右驍衛將軍晟子仁壽中爲漢王諒  
庫直甚見親狎於并州起兵南拒官軍留行布城守遂與  
豆盧毓等閉門拒諒城陷遇害

張祥京兆人并州司馬時漢王諒反遣將劉建功縱火燒其  
郭祥於城西王母廟再拜泣禱曰百姓何罪致此焚燒神  
其有靈可降雨相救言訖雨降火遂滅士卒感其至誠莫  
不用命賊退以功授開府

郭湛大業中祁縣令時縣人張道源以孝稱湛改其所居曰  
復禮鄉至孝里

陶模京兆人性明敏有器幹仁壽初爲嵐州司馬漢王諒舉  
兵刺史喬鍾葵發兵將赴諒模拒之曰漢王所圖不軌公  
荷國厚恩致位方伯謂當竭誠效命以答慈造豈有寢園  
未淹翻爲厲階鍾葵臨之以兵模辭氣不撓鍾葵義而釋  
之軍吏請斬模以壓衆心遂囚於獄諒平拜開府後從平  
楊元感以功進位銀青光祿大夫



王威太原郡丞大業十三年義兵將起威與武牙郎將高君雅相與疑懼請高祖禱雨晉祠將爲不利晉陽鄉長劉世龍知之以告高祖高祖執威君雅殺之

唐

劉文靜字肇仁京兆武功人大業末爲晉陽令與晉陽宮監裴寂善唐公鎮太原深自結託後坐李密姻屬繫秦王入禁所視之文靜曰太原百姓避盜者皆入此城文靜爲令數年知其豪傑可得十萬人尊公所領兵復且數萬君言出口誰敢不從秦王笑曰君言正合人意文靜遂介寂以交唐公叱左右執斬王威高君雅大將軍府建爲軍司馬又轉大丞相府司馬使突厥始畢始畢卽遣二千騎隨文靜至又獻馬千匹唐公喜曰非君何以致之尋敗桑顯和

執屈突通進授光祿大夫封魯國公唐初拜納言後拜民部尚書領陝東道行臺在僕射爲寂構害

殷嶠字開山雍州鄠縣人仕隋太谷長有治名義兵起召補大將軍府掾叅預謀略後封鄖國公卒諡節

張文瓘字稚圭貝州武城人貞觀初舉明經補并州參軍時李勣爲長史深禮之嘗嘆曰稚圭今之管蕭吾所不及勣入朝文瓘與屬僚二人皆餞勣贈以佩刀玉帶而不及文瓘文瓘以疑請勣曰子無爲嫌若某猶豫少決故贈以刀欲其果于斷某放誕少檢故贈以帶欲其守約束若子才無施不可焉用贈因極推引歷拜同三品遂與勣同爲宰相晉侍中兼太子賓客卒諡曰懿

孫湛貞觀中爲榆次令引洞渦水西流溉田民利之政以嚴



稱吏不敢犯

鄧義高宗時爲祁縣令有異政邑人刻石頌之

張柬之字孟將襄陽人登進士第調清源丞永昌元年以賢良召時年七十餘對策第一狄仁傑姚崇薦之累拜鳳閣侍郎同平章事誅張易之昌宗以功擢天官尙書同三品封漢陽郡王加特進爲武三思所誣貶瀧州卒景雲中贈中書令諡文貞

韋安石京兆萬年人孝寬曾孫舉明經永昌元年爲并州司馬有善政則天手勞之曰聞卿在彼庶事從心善事表於能官仁明彰於鎮撫如此稱職深慰朕懷俄拜并州刺史安石性持重少言笑爲政清嚴所在人吏咸畏憚之久視中拜鸞臺侍郎同平章事中書令封郇國公景雲二年坐

事出爲蒲州刺史太常卿姜皎有所請拒之皎弟御史中丞晦諷御史劾奏貶籍憤卒後贈蒲州刺史天寶初諡文貞

富嘉謨雍州武功人舉進士長安中爲晉陽尉與同官吳少微友善先是撰碑頌皆以徐庾爲宗嘉謨與少微屬詞皆以經典爲本時人欽慕文體一變稱富吳體而太原人土實先化之嘉謨作雙龍泉頌乾燭谷頌少微撰崇福寺鐘銘詞最高雅作者推重長史張仁直待以殊禮坐必同榻中興初歷左臺監察御史卒

吳少微新安人舉進士長安中官晉陽尉長史張仁直重之嘗爲撰進九鼎銘表神龍初以薦拜右臺監察御史富嘉謨卒少微賦詩哭之尋病卒



谷倚魏郡人長安中官太原主簿以文詞著名與富嘉謨吳少微時人謂北京三傑後留寓客卒

張知泰蒲州河東人舉明經神龍中累拜御史封漁陽郡公以忤武三思出為并州刺史天兵軍使仍帶本官尋徙魏州卒諡曰定

呂元泰為清源尉神龍元年大水求言元泰上書言時政曰國家者至公之神噐一正則難傾一傾則難正今中興政化之始幾微之際可不慎哉自頃營寺塔度僧尼施與不絕非所謂急務也林胡數叛獯虜內侵帑藏虛竭戶口亡散天下人失業不謂太平邊兵未解不謂無事水旱為災不謂年登倉廩未實不謂國富而乃驅役飢凍雕鐫木石營構不急勞費日深恐非陛下中興之要也比見坊邑相

率為渾脫隊駿馬胡服名曰蘇莫遮旗鼓相當軍陣勢也騰逐喧譟戰爭象也錦繡夸競害女工也督斂貧弱傷政體也雜服相歡非雅樂也渾脫為號非美名也安可以禮義之朝法侈靡之俗詩云京邑翼翼四方是則非先王之禮樂而示則於四方臣所未諭書曰謀時寒若何必羸形體灌衢路鼓舞跳躍而索寒焉書聞不報

嚴挺之華州華陰人景雲中舉進士開元二年為太原少尹殿中監王毛仲嘗使太原朔方幽州計會兵馬後累年仍牒太原索噐仗挺之以不挾勅且毛仲寵幸久恐有變故密奏之涖任嚴整吏不敢犯及毛仲得罪上以挺之言忠擢為刑部侍郎後李林甫嫉之出歷絳州刺史上問曰嚴挺之安在此其才可用林甫退召其弟損之曰上視絳州



厚要當以事自解歸得見上且大用挺之稱疾林甫得奏  
卽言挺之願得閑官自養上恨叱久之乃以爲員外詹事  
卒

戴謙爲文水縣令開元二年於縣東北五十里鑿甘泉渠二  
十五里鑿蕩沙渠二十五里鑿靈長渠于畝渠俱引文谷  
水傳溉田數千頃

杜暹濮州濮陽人舉明經開元十四年同平章事未幾罷累  
轉太原尹二十年上幸北都晉戶部尚書許扈蹕還封魏  
縣侯卒贈尚書右丞相諡貞孝暹公清勤約不通獻遺所  
至以廉幹聞

韋濟鄭州武陽人隴右河西黜陟使恒子也開元中爲太原  
尹製先德詩四章述祖父之行辭致高雅天寶中爲尚書

左丞濟從容雅度所蒞人推善政終馮翊太守

李銳宗室子明皇時爲太原少尹遷汾州刺史善於職復爲  
太原少尹築天城軍完葺邊備卒贈尚書右僕射

安庭堅開元中爲太谷縣令有德政邑人立碑以紀德

李殷爲太谷令北京尹上言殷釐務公廉以德化下獄無囚  
繫刑無鞭扑薪水之事不擾於民力賦興之數不失於公  
程三時勸農躬行田井乾糒曝鐵裹行而食一邑熙熙長  
幼有序流者歸復如戀父母今考秩垂滿衆情愿留敢希  
明恩重令治任詔下褒美量留一年

楊仲續爲祁令甚有德惠人爲立祠

崔衍字著深州安平人太子賓客倫子天寶末擢明經爲清  
源令勸民力田懷附流亡觀察使馬燧表其能徙美原累



山西通志 卷八十七  
遷宣欵池觀察使

辛旻從李光弼定恒趙後署太原三城使史思明屯相州及  
滏陽旻逆擊走之後守河陽卒

烏承玘字德潤張掖人累立戰功李光弼表爲冠軍將軍封  
昌化郡王爲石嶺軍使王思禮爲節度使軍政倚辦焉  
路審中徐州吏龐賊之亂著奇節累擢嵐州刺史鄭畋謂其  
節貫神明請擢爲右羽林將軍詔可

後唐

何瓚閩人唐末舉進士及第莊宗爲太原節度使辟爲判官  
張承業卒代知留守事爲人明敏通於吏事外若踈簡而  
內頗周密馬步都虞候孟知祥等胥以軍禮見瓚常繩知  
祥以法莊宗建大號拜諫議大夫明宗時拜西川節度副

使卒

李承勳爲太原少尹晉王遣使燕賀冊尚父至燕而劉守光  
已僭號有司迫承勳稱臣承勳不屈以列國交聘禮入見  
守光怒殺之

後周

李穀字惟珍潁州汝陰人身長八尺容貌魁偉舉進士漢乾  
祐中討河中掌轉運周廣順初拜中書侍郎平章事仍判  
三司顯德中從征太原遇賊于高平匿山谷中信宿而出  
追及乘輿世宗慰撫之命穀先調兵食又代符彥卿判太  
原行府事師還進司空恭帝封趙國公求歸洛宋建隆元  
年卒贈侍中

宋



田仁朗大名元城人宋初爲內職開寶二年征太原與陳承昭壅汾水灌城太平興國四年征太原與閣門祇候劉緒按行太原城四面濠砦視梯衝器械太原平留爲兵馬鈐轄閑廐使武再興軍器庫副使賈湜並爲巡檢俄命與再興役民築榆次新城端拱中卒仁朗沈厚有謀略所至著善政內職中咸以仁朗爲稱首

高繼勳字紹先瓊子咸平中遷洛苑使并代州鈐轄徙屯岢嵐軍遼兵五萬屯草城川誘令南伏兵寒光嶺大敗之遷弓箭庫使賜金帶錦袍徙麟府州鈐轄時屯兵河外饋運不屬繼勳扼兔毛川援送軍食師乃濟累遷馬軍副都指揮使授建雄軍節度使卒贈太尉後追封康王謚穆武龔父咸平二年任榆次令營建廟學雅重士流

文彥博并州介休人天聖中以殿中丞署榆次縣事有思鳳亭記

張伯玉仁宗時爲太谷令愛民勤政廣興水利邑民賴之尤以文章著名

張載字子厚郿人父迪殿中丞知涪州事載嘉祐二年登進士第始仕邠縣司法遷丹徒雲巖縣令又遷著作郎簽書渭州軍事判官熙寧二年冬被召入對除崇文館校書明年移疾十年復召還館同知太常禮院是年謁告西歸行至臨潼卒於館舍享年五十有八葬於涪州墓南載學古力行以易爲宗以中庸爲體以孔孟爲法作關中士人宗師世稱橫渠先生著正蒙東西銘行於世程灝言西銘理一而分殊擴前聖所未發與孟子性善養氣之論同功淳



祐初封郿伯從祀孔子廟庭

滕甫字元發以字行知太原府河東兵勞民貧而土豪將吏皆利于有警故喜作邊事民不堪命甫始至蕃族來賀令曰謹斥候無開邊隙有寇而失備與無寇而生事者皆斬自軍司馬沿邊安撫以下皆勒以軍法西人獵境上河外諸將請益兵甫曰寇來則死之吾不出一兵也河東十二月邊郡稱有警請八將皆上謂之防秋甫曰賊若并兵犯我雖八將不敵也若其不來四將足矣卒遣更休而將吏懼甚扣閣爭之甫指其頸曰吾已捨此矣頸可斷兵不可出卒無寇省芻粟十五萬河東之所患者鹽與和糴也甫稍更其法明著稅額而通鹽商配率糧草視物力高下而

不以占田多少爲差民以爲便陽曲縣舊治城西汾決徙城中縣廢爲荒田甫奏還之使縣堤防如黃河民復成市諸將駐列城者長吏或不悅摺誣以事有至死者甫奏立法將有罪徙他郡訊驗諸將聞之喜曰公保吾生當報以死西夏請復故地詔賜以四寨而葭蘆隸河東甫曰取城易棄城難昔棄囉瓦西人襲我不備喪金帛不貲且爲所笑乃命部將柴虎蕭士元以兵護遷號令嚴整寇不敢近無一瓦之失將賜寨甫請先畫界而後棄不從西人已得地則請凡畫界以綏德城爲法從之甫曰若法綏德以二十里爲界則吳堡去葭蘆百二十里爲失百里矣兵家以進退尺寸爲強弱今一舉而失百里不可力爭之已而謀者得西人之謀曰吾將出勁兵于義吳二寨之間劫漢使



山西通志 卷八十一  
不得出兵則二寨亦棄矣甫遂復申前議章九上至數萬言議者謂近世名將無及甫者甫爲文與詩英發妙麗每出一篇學者爭誦之篤于行義事父母撫諸弟以孝友聞臨大事決大議毅然不計死生至於已私則小心莊栗惟恐有過其事上及與人交馭將吏待妻子奴婢一以至誠仕至大理評事右光祿大夫龍圖閣學士上柱國南陽郡開國侯有文集二十卷

劉渙字仲章保塞人文質子以父任監并州倉天聖中上書請章獻后還政將黥隸呂夷簡薛奎力救得免後擢右正言會河東走馬承受奏渙他事坐貶尋知遼州熙寧中以工部尚書致仕卒

張岳字子雲府州府谷人爲內殿崇班元昊破豐州與諸將

一日數戰破容州刺史耶布移守貴三砦俘獲萬計遷禮賓副使明鎬在河東以岢嵐軍當雲朔路奏岳爲麟府路駐泊都監兼沿邊都巡檢使駐岢嵐張亢修瀕河堡障初議置安豐砦于石臺神岳以爲非要害地遂徙砦於生地骨堆以扼賊左右親信曰擅易砦地可乎岳曰苟利國家得罪無憾也卒易之已而本道上言左遷絳州兵馬都監二州未解嚴復麟府駐泊都監屯安豐累遷洛苑使嘗從數騎夜入羗中偵機事旣還羗覺追之岳隨羗疾馳効羗語與羗俱行數里乃得脫前後中流矢創發卒

馮京字當世鄂州江夏人舉進士自鄉舉禮部至廷試皆第一英宗時以端明殿學士知太原府神宗立召爲翰林學士擢樞密副使時河東麟府豐三州城壘兵械不治官吏



皆受譴京以先帥本道上章自劾曰使諸路帥臣知其雖一時脫去後能倖竊名位者猶必行法將不敢復偷情曠職優詔不聽晉參知政事出外又召知樞密院事致仕卒謚文簡京爲郡守諸縣公事報下捷疾一無壅滯人服其敏云

王素字仲儀莘人太尉旦季子賜進士出身熙寧初以端明殿學士知太原府汾河大溢素曰若壞平晉遂灌州城矣亟命具舟楫築堤以塹之一夕水驟至人賴以安入知通進銀臺司致仕卒謚懿敏

司馬旦解州夏縣人池子以父任歷知祁縣天大旱人乏食群盜剽劫富家巨室至以兵自衛旦召富者開以禍福於是爭出粟減直以糶猶不失其贏饑者獲濟盜患亦弭舉

監在京百萬倉時祁隸太原以太原留不召仕至大中大夫卒

范純仁吳縣人仲淹子哲宗時判太原境內民貧多暴其親純仁遣屬收葬無主燼骨復檄一路倣此時葬者以萬計後判國子監以劾王安石左遷河中府累官至尚書右僕射謚忠宣

范純禮純仁弟知太原初禁宰牛未得令會有牛死者純禮以數百錢買瘞之宰牛者愧而自止每給糧官吏及軍士皆出一版雖有濕惡衆無怨言

郭永大名府元城人少剛明勇決身長七尺鬚髯若神以祖任入官知太谷縣太原帥率用重臣每宴饗費千金取隸縣以給斂諸太谷者尤亟永以書抵幕府曰非十一而取



皆民膏血也以資觴豆之費可乎脫不獲命令有投劾而歸耳府不敢迫縣有潭出雲歲旱巫乘此譁民永杖巫暴日中兩立至縣人刻石紀其異府遣卒數輩號警盜刺諸縣短長遊蠹不歸莫敢迕永械致之府府爲并他縣追還部使者及郡文移有不便於民必條利病反復或遂寢而不行人謂永毋賈禍永曰知行吾志而已遑恤其它太谷人安其政以爲自有令無永比者旣去數年復過之則老稚遮留如永始去靖康末提點河東刑獄建炎初宗澤檄犄角大名遂殉城謚勇節

桑安世紹聖初知榆次縣事勸課農桑教民務本嘗引澗河水曲折數十里溉田惠利不竭

陳知白爲太原縣尉分引晉水灌田民用大饒

王舜臣元符二年任岢嵐牧時兵破夏寇擒其僞將嵬阿里遼人代爲請和舜臣上言爭之章惇納賂寢其議祀名宦鄭驤字潛翁信州玉山人元符進士通判岢嵐軍高宗初以直秘閣知同州兼沿河安撫使殉城謚威愍

范純粹字德孺仲淹子用蔭入官徽宗初復寶文閣待制知太原府後入黨禁復徽猷閣待制卒純粹沉毅有幹畧才應時須歷任胥以治辦聞

曾肇字子開建昌南豐人鞏弟第進士建中靖國中以龍圖閣學士知太原府崇寧中蔡京得政落職卒肇更十一州類多善政云

師範丹徒人崇寧初督岢嵐軍政守嵐時太原等十一郡地震彌旬晝夜不止壞城壁屋宇人畜死者甚衆範上言請



復正臣豐稷去蔡卞邢恕呂嘉問安惇蹇序辰奸佞以回天變蔡卞覩其奏大怒裂牘不使上進傳假旨配嶺南去之時嵐人遮哭於道車馬不得行

劉适武經郎政和三年任岢嵐牧政尙簡樸連理杏十餘株生廳舍時以爲德政所感

錢卽字中道吳越王諸孫第進士徽宗時爲徽猷閣待制知太原府以童貫宣撫本道辭不許居二年以疾提舉洞霄宮後童貫引爲河北河東參謀以老固辭致仕卒謚忠定蘇過字叔黨眉州人軾子以詩賦解兩浙路禮部試下任右承務郎徽宗時監太原府稅亟游晉溪終通判中山府過圃名小斜川自號斜川居士時稱小坡蓋以軾爲大坡也唐恪字欽叟杭州錢塘人以蔭登第知榆次縣豪子雄於鄉

萃逋庇姦不輸公賦前後莫敢詰恪以理善曉之悟而自改折節爲長者最聞擢提舉河東常平靖康元年同知樞密院事爲中書侍郎八月晉拜少宰罷後以議張邦昌仰藥卒

陳從易字簡夫泉州晉江人第進士爲嵐州團練推官仕至龍圖閣直學士卒從易好古篤行歷官以清德聞

盛子思崇寧間知榆次兼兵馬監押教閱保甲持身廉慎文行政事皆可師法民口碑嘖嘖不置祀名宦

李諒宣和初知榆次兼管兵馬司公事性平恕富經術政尙寬簡人以良牧稱之祀名宦

黃友字龍友溫州平陽人七歲能詩長入太學每謂同舍曰大丈夫不能爲國立功是亦造化中贅物耳登崇寧五年



進士第累立戰功除直秘閣時常勝軍郭藥師叛諸郡響  
應友率數千人躬冒矢石與戰欽宗召問稱嘆進直徽猷  
閣制置司叅謀隨种師中解太原圍引兵奪榆次縣明日  
進十里而止友白師中以非地不聽嘆曰事去矣黎明士  
卒奔潰友被執寇曰降卽赦汝友厲聲曰男兒死耳罵不  
絕口寇怒以脂蠟塗其身倒豎焚之朝廷贈官至中大夫  
御書忠節傳家字旌其門閭官其後八人錫命有云緣廟  
謨之失策致榆次之僨師兵盡道窮執節不撓特優贈典  
用慰忠魂

金

盧孝儉宣德州人登天眷二年第調憲州軍事判官累官太  
原少尹大定二年陝西用兵尙書省發本路稅粟赴平涼

充軍實期甚嚴迫孝儉輒易以金帛馳至平涼用省而不  
失期并人稱之用廉晉官二階後以轉運山東子用官帑  
及禍

蒲機知文水縣開常稔渠有碑記

烏古論德升益都路猛安人明昌二年進士爲絳陽軍節度  
副使大安初除侍御史論西京留守紇石烈執中姦惡衛  
紹王不聽貞祐初以翰林侍讀權參知政事出爲汾陽軍  
節度使河東北路宣撫副使改知太原府事權元帥左監  
軍興定元年元兵急攻太原糧道絕德升屢出兵戰道復  
通遷官一階二年真授左監軍行元帥府事元兵復圍太  
原環之數匝已破濠垣德升植柵爲拒出其家銀幣及馬  
賞戰士元軍壞城西北隅以入德升聯車塞之三却三登



矢石如雨守陴者不能立城破德升至府署謂其姑及妻曰吾守此數年不幸力窮乃自經死姑及妻皆自殺贈翰林學士承旨子兀里偉幼詔以奉御俸養之

楊伯元字長卿開封尉氏縣人登大定二年進士第調鄆城主簿進榆次令召爲大理評事官至工部侍郎累遷安武軍節度使以才幹多被委任爲推排定課使及審錄官人稱其平卒諡曰達祀名宦

史純大定間以忠顯校尉爲陽曲縣令撫馴其民嘗禱雨烈石祠有應自作記

楊邦基字德懋華陰人好學天眷二年登進士第爲太原交城令太原尹徒單恭貪汙不法託名鑄金佛命屬縣輸金邦基獨不與徒單恭怒召至府將以手持鐵柱杖撞邦基

函邦基不動承德廉察官吏尹與九縣令皆免去邦基以廉爲河東第一召爲禮部主事大定中同知西京留守事致仕卒

烏林答吾干女泰和三年爲榆次令有讖幹訟者立辯曲直無不允服

喬天翼爲合河令元兵陷城不屈死嘉靖三十二年提學閔註以涖政有功臨難守節請登正祀

李好復中山安喜人爲榆次令安集流逋撲滅奸盜後入爲巡警使嘗縛一犯禁護衛寘於法人憚其嚴

元

馬英初遁跡石州金末避兵合河元署興州觀察使判官政成訟息惠愛及民嘉靖三十二年崇祀



山西通志 卷八十七  
三  
攸哈剌拔都渤海人善射戊寅授金虎符河東北路兵馬都  
元帥鎮太原修城池繕兵甲招降屬邑市肆不改遠近聞  
之皆相率來歸嘗微服夜出聞民間語曰吾屬父母子女  
相失矣下令軍中凡俘獲有親者聽贖無貲者官爲贖之  
民得完聚者衆庚辰金梁知府立西風寨奪耕牛哈剌拔  
都殺梁知府驅耕牛還又破隰州辛巳三月引甲騎十餘  
人救壽陽王胡莊道三交大戰金兵遁五月金趙權府圍  
太原將騎三十出西門金兵又遁癸未大敗金師於太谷  
縣甲申六月平陵井寨乙酉二月清泉寨降石家昂亦降  
丁亥五月奸人夜獻太原東門於武仙仙引兵入哈剌拔  
都鏖戰仙兵大至諸將自城門外呼曰當速出哈剌拔都  
曰真定史天倪平陽李守忠隰州田雄皆失守矣我又棄

太原將何面目見主上及國王乎家屬任公等所俘吾誓  
與城存亡遂沒於陣太祖以其子幼命其表弟王七十復  
守太原後又命哈剌拔都長子忙兀臺嗣守太原

譚澄字彥清懷來人父資榮金末爲交城令以縣來附賜金  
符爲元帥左都監仍兼交城令年四十移病舉弟資用自  
代資用卒澄襲職澄幼穎敏爲交城令時年十九汾陽郭  
帥堰文谷水折以理令均其利於民豪民持吏短長察得  
主名皆以法治之乙未籍民戶有司多以浮客占籍及征  
賦逃竄殆盡官爲稱貸民無以償澄入覲因中書耶律楚  
材面陳其害太宗惻然免之壬子復大籍民澄盡削交城  
之不土著者賦以時集甲寅留世祖藩府而以其弟山代  
爲交城令



胡祇通字紹開磁州武安人至元元年忤阿合馬出爲太原路治中兼提舉本路鐵冶將以歲賦不辦責之及涖職乃以最聞改河東山西道提刑按察副使

程元直亳州人至元間爲交城令勸農興學政平訟簡陞絳州守祀名宦

李德輝字仲實通州潞縣人年六十監酒豐州市筆札錄書夜誦不休中統中爲山西宣慰使權勢之家籍民爲奴者咸按而免之復業近千人至元元年授太原路總管時潛藩故傅相無有出爲二千石者上以太原難治故以德輝爲守至郡崇學校表孝節勸耕桑立社倉一權度凡可以阜民者無不爲之嘉禾瑞麥六出其境五年徵入七年命錄囚山西河東行至懷仁民有魏氏發得木偶持告其妻

爲厭勝移數獄詞皆具德輝察其寃知魏氏有愛妾疑妾將構陷其妻召妾鞠之不移時而服遂杖其夫而論妾以死時稱神明

楊致道清苑人天曆二年由西河主簿陞文水縣令蒞任五載清潔善撫字爲諸縣最

程克明禹城人榆次尹下車首詢民瘼修舉惠政會歲饑勸富室出粟賑之所全活甚衆

張儉大同人延祐間自秀容主簿遷榆次尹爲政公平斷獄明允旁邑訟有不直者咸來質成尤能以善廸人而喻以愛親敬長之道百姓愛之立德政碑

月輪失帖水兒延祐間治太谷公廉有爲嘗請免太谷協濟庶民爲立碑頌德



齊思恭大名路人先爲國子助教元統間尹榆次涖政嚴明  
豪猾斂跡邑人愛慕久而不衰

齊元彝樂城人至正間知興州撫字有方流移者咸復其業  
民爲立石

劉鏞忻州人至正間合榆次以儒飾吏筆翰如流時巨寇劉  
入忽等自陝至潛出邑境鏞察其有異收之果服人以爲  
神代去民爲立石誦之

李繼本東安人至正間以翰林檢討出爲山西省理問尋授  
太原府同知以文學政事著聲有文集行於世

楊克公河間景州人至正四年任興州知州革弊平訟吏民  
思之嘉靖三十二年崇祀

侯洪字有容太原人舉進士初爲離石判官進尹榆次廉直

無私遇事立決雖簿書纖悉不遺祀名宦

顏瑜曲阜人復聖公五十七代孫以行誼舉任陽曲教諭訓  
迪士子殷殷不倦被賊執罵不絕口死之祀名宦







山西通志 卷八十八  
潘原英山東歷城人洪武初任太原縣知縣改築城池重葺廟學雅善課士當兵戈凋殘之際興賢育才絃誦不輟祀名宦

尹暹安豐人洪武初任興縣政平訟簡賦役均平陞知遼州民思其惠立善政碑後遷平陽府同知

韓文寶洪武二年任徐溝縣知縣措置有方公廨學校壇壝驛傳以次修舉祀名宦

胡維賢直隸定遠縣人洪武五年以平陽府同知陞太原知府清謹端正剔蠹蒐弊解紛決壅談笑處之創修太原府治見葉砥碑記

姚翥直隸永平人洪武三十年任榆次縣知縣公廉謹恪泣政有爲民懷其惠擢知府祀名宦

王天爵南部人洪武間以賢良舉知太原府直諒不欺當初赴召時太祖問所讀經以書對因試欽若昊天文稱旨問治州縣如何對曰首在得民心民心旣得則州縣事治矣又問以知府對曰當戒左右無爲州縣擾則府事治矣旣又問以布政使對曰是則臣見所未及也太祖歎息稱善遂以太原命之居官有治績

劉觀直隸保定人洪武間以進士任太谷縣知縣善催科不事敲扑而輸將競勸聽訟能得情政事之暇督諸生讀書親爲講授以考績去行李蕭然擢監察御史累官布政司叅政祀名宦

施文學洪武間任岢嵐知州時岢嵐遺黎僅存文學撫綏有法民獲復蘇乃按古酌今於有關治化者悉力修舉祀名



宦

黃福字如錫山東萊州府昌邑縣人洪武間由鄉貢初授項城縣簿改清源清廉仁愛民無不懷以憂去後陞京衛知事尋陞經歷上書論國大計太祖奇之陞工部右侍郎成祖朝遷左陞尚書改刑部撫綏交趾幾二十年交人戴之如父母仁宗朝召還交人號泣不舍福既還交寇黎利乃叛命將討之福偕行戰失利福為寇得皆下馬拜禮送北歸拜戶部尚書尋轉南京吏部正統初進少保福始終以國家生民為念卒年七十有八贈太保諡忠宣

宋炏唐縣人洪武中以人材任祁縣廉慎有為以才行超卓遷御史終知府

陳章應晉江人洪武中進士榆次縣丞調安邱藩憲考其學

優廉幹以狀聞特降旌榜嘉之終禮部主事

馬謙順德人洪武間交城縣丞興學勸農政績甚著陞戶部主事

陳棟儀封人洪武間任文水崇尚文學以禮導民

張羽陝西武功人舉人洪武三十四年任文水令建治廨學

邑有稱十虎三彪一太歲者悉按法徙之時以為能

郝瑾邯鄲人永樂中任太原縣有惠政滿去人多思慕之

汪添昂麻城人永樂間任祁縣以循良著績

崔忠唐縣人永樂間嵐縣典史在任九載廉聲大播

蘭從善河南磁州人永樂間任太原縣儒學教諭博學工文造士寬嚴有方退仍手一卷諷詠後累官翰林學士

劉俊直隸淮安人永樂間任榆次縣知縣器宇軒豁遇事周



詳慎重措置得宜未浹期頌聲不作祀名宦

范宣河南歸德人永樂十三年任榆次縣訓導邃於問學章采蔚然言動有則諸生奉爲模楷祀名宦

楊春汶上人宣德間任文水政尚簡易時稱爲良牧

孫慶安定州人宣德間任興縣多所營繕不取於民後陞監察御史

周禮任邱人正統間祁縣丞學問該博造士綏民

郝鳳直隸人正統十三年任嵐縣令修城捍民設阱禦虜

劉純山東歷城縣人正統十年任嵐縣令剛直不阿人皆稱頌

王璉咸陽人正統間任嵐縣以廉能稱

張瓚字宗器孝感人正統十三年進士知太原府有善政後

巡撫四川移總督漕運卒

劉文莊直隸正定人正統間任太原府知府習吏事知民隱興舉悉當聽訟明敏祀名宦

劉因鹽城人正統初以布政司檢校擢陽曲縣知縣能以廉自守涖政明敏無留牘累官應天府治中祀名宦

劉敏直隸大興人正統間以舉人任太原縣知縣修葺城垣濬鑿濠塹練習吏事行寬於嚴擢太原府同知祀名宦

滕淵祥符人正統間任嵐縣典史有廉能聲當道皆重其材嘗承檄率民兵戍偏頭關秩滿去行李蕭然祀名宦

王恭直隸晉州人景泰三年以舉人任榆次縣訓導性恭謹與諸生講解日夕不倦聞者豁然祀名宦

劉震字伯威河南洛陽人景泰七年任榆次縣知縣撫民以



山西通志 卷八十八 名宦  
恩尤慎於刑獄而豪強讐服盜賊自化祀名宦

黨忠字行恕陝西富平人景泰間以舉人任榆次縣教諭嚴  
重有師範勤於作人所列科條詳明簡要在白鹿鷺湖之  
間祀名宦

李維新陝西狄道人景泰七年以監生任徐溝縣知縣政以  
振飭爲先蒞任九年擢中城指揮祀名宦

張玘直隸霸州人景泰間以監生知清源縣重學惠民後陞  
霍州知州祀名宦

高安河南睢州人景泰間以進士任文水縣知縣揮霍有長  
材處煩劇裁決裕如施爲有次第嘗修縣廨開渠水迄成  
功不用民間一錢擢監察御史祀名宦  
成憲字伯度山東新泰人天順元年以舉人任榆次縣訓導

博極羣書於易尤邃善化導經指授者悉有成就祀名宦  
宋賓中部舉人天順間任陽曲簿詢民隱抑制豪強陞陝州  
知州

王孕延津人天順間任祁縣牧民有方旣去人思之  
孫緝豐城進士天順間任嵐縣剛毅不苟決斷如流吏畏其  
明訟願其愬重修文廟陞監察御史

王準陝西神木人天順間任嵐縣知縣清廉勤慎嘗修學宮  
翊文教士風丕變祀名宦

陳鎰臨清人舉人成化二年知岢嵐州蒞政三載教化大行  
歲旱省刑撤從禱城隍曰吾與公幽明雖殊同主一方忍  
眎斯民坐斃邪乃以鐵索各繫其頸同暴烈日中領之大  
雨任內嘉穀生祀名宦



張紀成化間任岢嵐警敏有才智舉不失當尤長於救荒貧  
窶廢業者施給牛種流民皆歸

張鼎字大器陝西咸寧人成化間以進士知太原府鼎受業  
薛文清與聞性命之指涖太原豪黠孟氏挾其家人暴里  
中鼎按以法指揮董敬誣人下獄已論斃鼎廉其枉出之  
後歷官戶部右侍郎

宋信字中孚趙州人成化五年以舉人任榆次縣知縣有清  
操不事鞭扑而張弛鑿鑿中理境內大治祀名宦

梁琮字廷玉蠡縣人成化二十二年以舉人任榆次縣知縣  
貌古樸言呐呐不出口而彊毅有爲治具畢舉祀名宦

劉偉陝西朝邑人成化間以進士任文水縣知縣持身清慎  
遇事剛方有爲嘗違衆議積穀萬餘石備荒歉民卒賴之

### 擢監察御史祀名宦

張壽陝西華陰人成化間以舉人任太谷縣知縣性高潔剛  
正有爲時衣舊布袍飯脫粟佐以藜藿部使過邑中供億  
甚菲頗怒之旣入其寢室惟律一部公服一襲乃亟加優  
禮任九年以內擢去祀名宦

李時弘治間任岢嵐剛柔適中賞罰必信當道才之累行旌  
異陞漢中府同知民遮道餞送無不泣下

劉經直隸宛平人弘治間以舉人任太原縣知縣性坦直政  
尚和平前令劉敏以嚴有聲經以寬繼之時稱濟美擢監  
察御史祀名宦

溫敬武安人弘治五年以監生任榆次縣主簿操守甚嚴請  
托竿牘咸謝絕有材幹能治煩劇祀名宦



山西通志 卷八十八  
張鐸字道鳴陝西人弘治六年以舉人任榆次縣知縣持身清介視事後閉門絕客政平訟簡吏民皆懷尋改嵐縣遮道泣留者數千人祀名宦

張鑑河間人弘治九年以舉人任榆次縣知縣性溫和能恤民祀名宦

宇文鍾乾州人弘治九年以舉人任榆次縣教諭學問閎博善開導諸生有疑義批卻導窾不數語輒曉暢其以文來正者就所製爲潤色頃刻數十篇人人悅服後舉進士累官監察御史祀名宦

劉鉉陝西咸寧人弘治間以舉人任祁縣知縣有威嚴能執法人望而畏之祀名宦

楊光澤山東沂水人弘治間以舉人任興縣知縣廉而能寬

撫字有方廢墜者及時建立尋調洪洞去之日老稚俱垂涕祀名宦

馬圖林縣人弘治間任興縣民素頑悍公賦屢年不輸前官多被訟去圖至歎曰豈惟民之過哉蓋由刑罰不中民視官如仇讐耳當以公平處之居六年百姓化其政前所負租悉爲補輸改建文廟於城中及陞去興人爲立祠後任沁州知州致仕子卿登進士官山西提學副使終都御史申綸永年進士正德間以平陸調太原縣度量寬洪爲政持大體期年陞潞州知州官至按察司副使

高道邠州監生正德間任清源政寬民悅刑省令行有真父母之稱

許孜咸陽舉人正德間尙嵐學正博極羣書誨人不倦其堂



聯云報國陶鎔忠孝士窮經講究聖賢心至今傳誦  
蘇民陝西人正德元年以進士任榆次縣知縣務持大體不  
事苛細民有犯者以道義諭之不率始懲以法暇日召諸  
生與之講解圖籍聞者奮起祀名宦

安國字良臣綏德衛人通春秋子史後襲世職指揮僉事正  
德三年中武會舉第一爲右副總兵協守大同徙延綏十  
一年冬寇二萬騎分掠偏頭關諸處國偕游擊杭雄馳敗  
之尙嵐州斬首八十餘級獲馬千餘匹寇遂遯晉都督同  
知卒諡武敏

李文號洛南正德間進士初任咸寧知縣陞主事恤刑陝西  
釋寃滯辯誣枉奏免逋欠數千人忤當道謫楚雄府推官  
改太原同知平孟礦之亂民賴以安及署平定篆釋獄禁

緩征求節財用均徭役恤逃亡撫窮獨民用以和

梅寧歸德舉人正德間自平谷教諭陞任太原縣有治事才  
前令修城數年不完寧至民咸樂趨一月畢工武宗由榆  
林幸宣府路經太原供應之物凡百俱備民不知擾

陳溥鄆陵人正德四年以進士任陽曲縣知縣性剛貞而勤  
慎措施務洽民心擢監察御史祀名宦

鄭德崇字道夫山東汶上人正德六年以進士任榆次縣知  
縣性簡重爲政清而能整不樂以威刑督吏民而服其化  
者皆肅然奉法後調德清縣祀名宦

張穆完縣人正德七年以舉人任榆次縣知縣性剛有威望  
遇事能斷抑侵漁剔浮蠹尤崇獎士類貧不能存者輒捐  
俸給之後以覲卒於道士民遙奠之哭聲震野祀名宦



陳悃陝州人正德九年以舉人任榆次縣知縣性嚴重爲政務經久遠抑強除蠹興學校理冤抑祀名宦

韓光表直隸任邱人正德間以舉人任徐溝縣知縣正直勤政事自旦至暮治文書不輟心存愛民務令得霑實惠祀名宦

王堯卿招遠人嘉靖初以監生任太原縣教諭待士以誠士咸服教與先教定興師範無以異後八年致仕諸生哭送聲震野祀名宦

徐元孝字子順浙江餘姚人嘉靖二年以舉人任榆次縣教諭性彞曠忽遽中言笑常自若循循善誘從遊者皆彬彬雅成名士典試四川擢平陸知縣祀名宦

宋橘濮州人嘉靖九年以舉人任徐溝縣知縣雅意愛民興

舉悉當飛蝗蔽天獨不入其境內祀名宦

俞鸞字應和陝西靈州守禦所人嘉靖二十二年以進士任榆次縣知縣精明有操守爲政寬猛互濟稱能吏祀名宦  
王一民東明人舉人嘉靖二十一年任文水令清節自持政平不擾築城垣建各鄉堡若干座後以誣劾掛冠去人共惜之

張天憲直隸高苑人嘉靖二十五年任太原縣縣丞性廉潔泣事明敏待人以誠邑賦舊多逋天憲示以期輸者雲集後以前任安化事罣誤去官祀名宦

鄭鎬河南安陽人嘉靖二十六年以舉人任交城縣知縣剛直有爲修葺學校城池公署倉庾之敝壞者又於城之四面及東南路植柳成林會歲饑人賴之以濟後擢安州知



山西通志 卷八十八 名宦

王遴字繼津霸州人嘉靖二十六年進士爲兵部員外郎爭楊繼盛事忤嚴嵩遷僉事再遷尙嵐兵備副使有威名爲巡撫所忌劾去官民相率訟寃詔許起用仕至兵部尙書歸卒贈太子太保追諡恭肅

王宮用字近臣直隸成安人嘉靖三十三年以進士任榆次縣知縣前令率尙操切宮用獨馭以寬和訟平賦清事咸就理邑稅歲千金多中飽宮用盡以報藩司無所染政暇輒進諸生教以立身行己之要尋以憂去後仕至太僕寺卿祀名宦

劉弘化湖廣長沙人嘉靖三十九年以進士任交城縣知縣有吏材居官以廉能著未浹期政教大行尋調安邑累官

尚寶卿祀名宦

蕭大亨字夏卿山東泰安人嘉靖四十二年以進士任榆次縣知縣性端嚴持大體不務赫赫聲而諸所厝注士民咸食其利後總督宣大視榆人爲故赤子撫恤尤摯嘗以關城卑薄爲甃其四面榆人立石紀之祀名宦

王珠鹽山人嘉靖四十五年以吏員任陽曲縣縣丞才識明敏折獄能晰情僞善應對嘗議欵塞外言辭侃侃聽者悚然尋擢大同府通判祀名宦

周誥汲縣舉人嘉靖間任徐溝沉靜有體馭下端嚴陞陝西苑馬寺寺丞平陽府同知

張天錫霸州進士由蘭州知州陞太原同知愷悌宜民陞陝西按察司僉事



江樊開化舉人貌樸心古詩詞敏捷嘉靖年太原府通判監修邊城齋金賑饑秋毫無染當道者稱之

薛煊魏縣人嘉靖間任文水立政平易綜理詳密完逋賦均徭役誣訟風息吏畏民懷其清約勤慎始終不渝

王楫新泰人嘉靖間任太谷嚴明不苛豪猾斂跡政平訟簡庭無私謁雅意愛士貧者多方賑濟歸田行李蕭然父老傳頌之

崔三畏蠡縣進士嘉靖間任太谷有惠政民有犯先諭以義理而後治之未嘗任情以盡法尤注意於學校後徵於朝士民遮道泣留歷官四川叅政

張九經文縣舉人嘉靖間任太原通判居官守正不求聲譽一生嗜古好學不問家產

張世忠字顯甫山海衛人嘉靖五年舉武會試爲大同叅將拒寇丁家莊有斬獲功二十一年爲山西叅將七月寇屯祁縣與副總兵段堂等合五營兵襲之堂軍潰於陸支村世忠力戰死贈左都督諡忠愍立祠致祭時百戶張宣張臣亦死並予卹而堂等胥論死

於惟一懷寧人嘉靖間以進士任太原府知府初下車會歲比不登民多流亡卽爲繪圖上請不待報可徑發倉廩賑之後擢陝西副使去之日送者塞路祀名宦

張祉固始人嘉靖間以進士任太原府知府愷悌慈仁數遇水旱躬爲祈禱敵騎入犯士民惶恐內徙祉冒雨登陴晝夜巡警累官陝西巡撫祀名宦

黃卿益都人嘉靖間以進士任太原府知府博學有操行重



農桑崇學校慎刑獄黃土寨大水漂沒居民以千計掩骸賑恤不遺餘力民舍火將延及學宮泣拜禱風反火熄在任六年擢浙江叅政後累官江西布政使祀名宦

金礪字霜鐔河南西華人嘉靖間以進士任太原縣知縣仁明能悉民隱舊造夏秋赤曆里書索費不貲計事給食歲省五百餘金水利歲久壅淤相其高下開新渠四十餘道溉田數百頃邵姚等都逃亡者過半給以籽種緩其徭役復業者千餘家又以學校爲育材地躬校閱賑貧乏鼓舞備至而涖任之初卽製戎器火具若干簡閱訓練爲百年計後遇敵竟以有備得免其經理詳密皆類此尋調汾陽父老爭走部乞留已復調陽曲涕泣攀臥車累日不得發陽城賈贈有文紀之

潘縉字朝紳陝西臨洮人嘉靖間以貢生任太原縣縣丞遇歲凶民朝夕不給而追呼者不爲止抗顏與爭竟得釋有婦抱子詣公庭愬其冤累日無所得食將就斃給以資斧又嘗念孤貧當隆冬有赤體者蠲橐中金買花布畀之而災黎無告待以舉火者且數千指也甫七閱月奉檄督逋賦不欲鞭扑窮民以博上官寵遂解組去太原人尸祝之尋請於學使祀名宦推官高陵李仙風有記

張承惠易州舉人嘉靖間任太谷性嚴毅人不敢干以私爲政務持大體不事徼察抑侵漁杜奸弊治豪強民賴以安尤加意於學校每朔望視學召諸生親授講說一時文行丕變以覲事卒於京士民爲之遙奠哀泣

劉奎耀東鹿人嘉靖間以舉人任太谷縣知縣性嚴重爲政



雅尚寬平民畏愛之如父母祀名宦

王允言直隸容城人嘉靖間以舉人任祁縣知縣負清操有明敏才撫民以惠衙蠹市魍胥屏息嘗遇兵患督吏民捍禦閭井獲安祀名宦

李朝綱武功舉人嘉靖間岢嵐兵備道慷慨剛直風紀肅然州牧叅戎不相能裁之以法各自悔罪

馮友陝西長安人嘉靖間以舉人任岢嵐州知州岢嵐數遭兵患歲比不登友相視高下肥瘠教以耕作又時歷田間爲言慈孝使知敦行誼成禮俗尋調忻州忻三歲三易守稱難治友馭以威嚴訟師一夕盡徙去中丞上其治行後擢保定同知祀名宦

張稽古陝西蒲城人嘉靖間以舉人任岢嵐州知州戇直不

畏強禦嘗按都御史楊順誣殺沈練事卒擬以法順繫獄死後歷本省按察使晉藩常侍欲以事干之固請遊別墅終弗許次日以盛饌來餽悉委棄溝壑中還其器其剛介如此祀名宦

張崇德咸陽人嘉靖間以貢任嵐縣知縣政教修明嘗遇邊警躬督吏民禦之比退復增修城池建祠祀焉

劉濬德平人嘉靖間以監生任嵐縣知縣剛毅廉介豪猾斂迹祀名宦

高鵬山東人嘉靖間任太原營叅將標兵王慶等作亂謀院門前巡撫踰垣避之鵬聞變披衣起坐堂上叛卒適至羅拜堦下曰我輩計出無聊願戴將軍爲主鵬以大義反覆開導不聽乃厲聲曰吾王臣寧守義不爲汝曹主也叛卒



知不可奪遂殺之時嚴氏在朝以危法中人寵賂滋章當事者惴惴方藉口以自解免終無白鵬死事者然晉人至今稱鵬忠義不去口

溫訓漢陰舉人隆慶三年任太原同知穎悟博學善詩文以清廉著稱陞戶部員外

王學謨朝邑人進士隆慶間岢嵐兵備道方正執法不避恩怨嚴飭武備議築河墻老營諸堡尋陞山東叅政

初旦博興舉人隆慶間任太谷遇事立斷百廢俱舉吏畏其威民懷其德

殷廷舉江西星子縣舉人隆慶間太原府同知承檄均丈定襄地糧悉心區畫不憚勞瘁臚列冊籍永爲遵守性慈祥所至輒進士民誨以孝弟力田之義一時相聚如家人父

子定襄人有遐思焉

薛懷奇河南新鄭人隆慶間以貢任交城訓導醇雅不縈情勢利與人接歡然終日喜怒不形諸生私相慶如在光風霽月尋爲權相中傷去祀名宦

趙禧益都貢隆慶間文水丞時值寇警日集鄉兵聯什伍登陴固守寇去民有遭殘毒者徧行弔問死者掩埋之

王下賢陝西鳳翔人隆慶間以舉人任岢嵐州知州廉明有禦變才初下車敵大舉入寇下賢陰設守禦具倉卒悉備比大兵過糧餉芻秣能以時供給無缺又約束將卒不得入民舍恣暴虐民咸賴之祀名宦

李愨直隸人隆慶間任岢嵐豁達老成時邊警告急有欲生事要功者議於岢嵐西北掘要路築長城其策甚迂四野



驚惑慤力抗不從民用以安

姚德重維縣人萬曆二年以進士任榆次縣知縣甘淡泊事上官恭謹有禮馭衙蠹市魑以嚴撫恤窮黎則又曲有恩意祀名宦

吳三省洛陽人萬曆四年以舉人任徐溝縣知縣疾惡如讐廉幹有爲凡事不屑近功嘗斃縣城爲萬年保障祀名宦李選白河人萬曆八年以選貢任陽曲縣縣丞雅度清操聽訟多所平反時大令屈灼以嚴肅勝選以寬大佐之民愛戴如父母擢知縣去祀名宦

李光祖字克肖保安人萬曆十一年以進士任榆次縣知縣仁慈能濟以嚴毅嘗遇歲饑賑給有法窮乏不至流移人尤感頌不置後擢監察御史祀名宦

于天經冠縣人萬曆十四年以進士任陽曲縣知縣清勤愛民初涖任卽策款段馬日隨二隸巡行阡陌間勤課農桑倦則止僧舍炊脫粟飯遇訟者以片詞折之歲饑停徵調屢蒙譴責不爲動尋以艱去攀臥數千人祀名宦

徐守謙洛陽人萬曆二十三年以進士任陽曲縣知縣通敏有吏才先任榆次有能聲遂以陽曲煩劇調涖之果斷明肅剖決如流治行大著擢監察御史未任卒士民立石識之祀名宦

周永春金鄉人萬曆三十年以進士任陽曲縣知縣念省會習俗奢侈以節儉爲先委曲開導又邑爲藩封地豪宗橫肆多誣陷平民悉裁以法涖任五年擢禮科給事中祀名宦



史記事字義伯陝西渭南人萬曆三十一年以進士補榆次縣精明果斷先任介休功績最著涖榆次益銳意民事築城濬渠嘗修縣志於邑徭役三致意焉後陞兵部主事改雲南道監察御史榆民建祠祀之並勒實政於石

劉似鰲字占宇直隸高陽人萬曆四十四年以進士任榆次縣知縣颺直負氣節先任聞喜調榆次捐俸設義學延名士主師席開東陽鎮水渠溉田數十頃分校鄉試秩滿擢刑部郎後以莊浪道佩四符辦理軍務卒於官事聞朝廷嘉其忠勤予祭葬

周詩山東德州人萬曆間以進士任太原府知府性剛直諳練庶務雪冤抑鋤豪猾寬嚴互劑時稱良守以乞休去祀名宦

王嗣美朝邑人萬曆進士爲太原推官持已廉約接人平恕每聽斷多所平反以明允稱擢戶科給事中

李元同州進士任祁縣平恕廉明均徭役省解納飭學宮恤行戶開渠穿井清驛彌盜革一切賠累剝削之苦民德之兩地立祠

談應春安化舉人萬曆間授興縣教諭率先化導士風丕變陞任嵐縣吏民畏威逋賦爭輸每朔望進弟子而誨文藝孜孜忘倦

屈鍾嶽字毓秀蒲城舉人萬曆間任太原清慎敏捷循聲籍籍尋轉光祿署正遷北部郎擢大同知府未幾卒鍾嶽有豁達之度不事纖趨居官正直不阿旅襯歸里行李蕭然孫化龍獲鹿人萬曆間以進士任太原府知府孟有妄男子



假巫爲奸利龍廉得其狀時適亢旱因使問雨期巫窮伏按左道法誅之在官數年能以廉靜率先屬邑祀名宦

賈毓祥平度人萬曆間以進士任太谷縣知縣操守嚴潔興利除害當時有真父母之稱祀名宦

張子清無極貢萬曆間任太谷興學育士減稅甦民晉中有何處春臺似太谷之謠八年陞永寧州

李懸同州人萬曆間任祁縣知縣明斷有守興學校均征徭開渠利民凡賠累苛派之弊毅然豁除被其德者咸深愛戴立祠祀之

王一龍陝西蘭州人萬曆間以舉人任徐溝縣知縣剛毅不畏強禦撫恤士民恩意曲摯後以抗閹宦謫官士民稱屈祀名宦

于彥英直隸固安人萬曆間以舉人任徐溝縣知縣器識英敏發摘奸伏如神嘗丈量地畝立法均平民咸德之祀名宦

馬天俸密雲衛人萬曆間任清源公明廉幹清丈地畝均平糧石地方永賴

周璧山東歷城人萬曆間以舉人任交城縣知縣實心愛民雅甘淡薄裁冗費墾荒田開河渠繕城堡尤加意學校於貧不能自存者時時賑給之祀名宦

姜一鳴陝西蒲城人萬曆間以舉人任文水縣知縣清介自持治窩禁暴其清丈田土賑恤凶荒民尤被實德云祀名宦

郭宗賢直隸邯鄲人萬曆間以舉人任文水縣知縣嚴明識



體要嘗修邑城迄今稱保障祀名宦

文養浩耀州舉人萬曆間任文水嚴革私科勾攝槩差水皂積穀備荒四境肅靜調嵐縣歷雲南知府建祠柏茆山巔祀之

陳良謨吳江舉人萬曆間文水教諭治書經聯社課藝從學者雲集中丞魏學憲杜檄詣鎮城書院訓多士甲午秋就聘分較闈中稱得人鄭之僑王在臺鄭宗周皆出其間後

陞涪州知州

李從心南樂進士萬曆間岢嵐兵備道嚴禁州縣饋遺重懲刁惡待軍民以恩收羅才勇以備時用人人奮敵愾之思吏治民情無一不悉

趙彥膚施人萬曆間以進士任岢嵐兵備道有應劇才尤精

兵畧嘗徧歷所部相度衝緩勾稽芻糧具能得其要領因為添防守易將衛廣城堡選智勇節省浮費逾十餘萬又修保德城高墉崇雉民勒政績於石立祠祀之

董仕河南汝陽人萬曆間以舉人任岢嵐州知州寬仁不喜立威獨於亂法之民不少假嘗廉健訟者立斃於獄一邑稱快擢潞安同知祀名宦

趙夢麟廣平進士由兵部主事謫任嵐縣清丈土地編審丁徭杜豪戶之兼併清奸胥之隱詭重建公廨百廢具舉陞兵部員外

張任學安岳人天啓五年進士授太原知縣以才調榆次崇禎四年舉治行卓異入為御史後請易武階改河南總兵官褫職卒



毛文炳河南鄭州人崇禎四年以進士自壽陽縣調榆次縣作興文教嚴禁賭博十七年歷任太原府冀寧道城陷死節入名宦祠

湯啟祥江南宜興人崇禎間以進士任太原府知府有清操不妄取愛民如子於奸猾爲害者窮治不少貸頌聲大起祀名宦

孫康周字晉侯安邱人舉於鄉崇禎末知太原府流賊入率死士巷戰被執說降不從乃見殺

任孔當濟寧進士崇禎間任陽曲俯詢利弊立爲興革時久旱步禱百里未至城大雨如注以艱去攀轅臥留者擁蔽不能行

彭而述河南鄧州人崇禎十四年以進士任陽曲縣知縣捐

金修城募民兵三百人號太原忠義營甲冑旗幟具備又買馬騾四百頭捐乘馬四匹給驛傳新城南狄梁公祠並衿其後裔使奉祭祀歲饑煮粥哺飢民祀名宦

范志泰虞城人爲長史崇禎末署陽曲縣事流賊陷城不食死

岳維楨直隸東明人崇禎間以保舉任清源縣知縣時值歲大饑盜賊蠡起維楨留心撫字俾民不流離又偵盜賊所在搗其巢穴殄滅之災患所在捍禦必力鄰邑胥獲安堵祀名宦

薛國柱陝西吳堡人崇禎間以進士知交城縣純樸精明能聽訟勤課士以時值流寇亂斃邑城四面鼓舞有方不期月事集後陞河南汝寧道監軍督餉祀名宦



張首標直隸玉田人崇禎間以進士知交城縣剛腸疾惡善折獄喜與儒生遊捐俸課藝親定甲乙調汾陽祀名宦王凝命崇禎間任交城縣知縣廉幹有為時寇盜孔棘悉力剿撫邑人胡曰蕃以犒軍歿於賊殮而殯之為文以祭卹其家特厚祀名宦

武清周華州舉人崇禎間任文水性剛正胥吏懾服值內璫過邑清周持以大體不少屈調繁汾陽縣

趙希壯崇禎間任文水典史慷慨負氣雖微官不肯自苟適流寇入縣境親督鄉兵往偵猝與賊遇遽前搏戰沒於陣

井東星朝邑舉人崇禎間任嵐縣嵐多逋賦東星勸輸有法民不擾而賦集致仕歸闖亂死節

國朝

梁加琦陝西安寨人有勇畧順治元年以將材從征闖賊西走收太原加琦充前鋒宣布

朝廷德意聞者胥踴躍歸附陝督孟喬芳薦授遊擊後任四川總統

楊三知字筠伯北直良鄉人順治三年以進士知榆次有膽畧氣節雲中姜變與紳民誓守不渝宿城上者六月卒保全又捐俸三百金創建社學置地五十畝延師訓士歷陞神木道死難恤贈如例

曹之賢遼東人順治四年以官生知文水縣年少精敏剖決如流吏民畏服姜逆之亂其黨率兵來攻竭力捍禦城陷遇害

李昌汴豐縣人順治四年知興縣剛方有守姜逆之亂城陷



山西通志 卷之八 三  
被執賊索印昌汴力抗不少屈遂爲賊殺

贈按察司僉事祀忠烈祠

張國賢直隸宛平人順治五年以舉人任太原府中路同知  
姜逆之亂慷慨臨戎以死事著

贈按察司副使祀忠烈祠

徐淳遼東人順治間任岢嵐兵備僉事道姜逆之亂偏關遙  
應之淳爲賊所執脅降不屈死

贈光祿寺少卿廕子入監祀忠烈祠

馬維熙順治間任忻州州同署太原府西路通判上官胥廉  
其才姜逆之亂偏關兵變不屈被殺

贈忻州知州祀忠烈祠

賈道醇蒲州人順治間以歲貢任太谷縣教諭姜逆之亂偕

署縣楊守城及陷賊執繫獄後先殉節

贈國子監助教祀忠烈祠

何顯祖順治間任陽曲縣主簿署忻州知州事有幹濟聲姜  
逆之亂督糧於鄉中塗遇賊被害

贈太原衛左衛經歷祀忠烈祠

楊其籍順治間任按察司照磨署太谷縣事有政聲姜逆之  
亂賊縛其籍逼降不屈繫獄死

贈布政司知事祀忠烈祠

王自亮順治間任太谷縣典史克舉其官姜逆之亂協守縣  
城城陷繫獄以死

贈濟源縣主簿祀忠烈祠

周邦翰順治間任布政司都事姜逆之亂賊徧西山交城缺



令人胥憚往邦翰獨請行招集流亡斬撫定驚氓適賊有  
內應邦翰拔佩刀擊亂者刀未出室爲左右所殺

贈都司經歷祀忠烈祠

鄭運昌江南人順治間任交城縣典史有能聲姜逆之亂與  
署縣周議分城以守內應起遂與周同日遇害

贈山陽縣主簿祀忠烈祠

謝應舉順治間任巡捕都司死姜逆之亂

贈遊擊祀忠烈祠

王廷衡陽曲人順治間任都司營中軍姜逆之亂賊據太原  
縣晉祠鎮廷衡繕攻具賊蕪之燔焉廷衡中乙酉武鄉試

第一以死勤事

詔恤其家祀忠烈祠

宋貴中順治間任冀寧道營千總死姜逆之亂

詔恤其家祀忠烈祠

王命新順治間任舊營千總死姜逆之亂

詔恤其家祀忠烈祠

邊大綬直隸任邱人順治八年任太原府知府有綜理才鉅  
細畢舉當姜鑲初平撫循而綬又之不遺力閭閻寢有起

色涖任五年號有治績

吳起爵廣東海揚人以克澎湖有功授太原總兵艱歸祀瓊

州名宦

劉果山東諸城人康熙三年以進士任太原府推官首捐俸  
修文廟立義學以課山谷秀民太原榆次諸縣引汾水溉  
田民滋爭訟果勤勘驗詳教條遠近先後胥有次第爭乃



息大盜傅青山李黃毛等盤踞交城葫蘆峪出沒無常授計趙令吉士曰當以勦爲撫亦卽以撫爲勦未幾羣盜後先授首富人某訟產先餽黃金五百假黃鼠以進峻却之當時謠曰死黃鼠瞞不過活青天後弟榮亦以進士知平陽府有治績

王惟籌華州人康熙四年以舉人任祁縣知縣創義學肄書課藝祁水爲豪強所據民不得灌溉毀其壩俾無敢壅以自利解組歸民爲立祠

趙吉士字天羽休寧人杭州府學生順治八年舉鄉試康熙七年銓知交城縣事交城居萬山中巖磴參錯畜馬絕有力又饒灌木時民間畜馬有禁上官廢南堡村木廠許汾河市賣由是利爲文水商民所奪交人重困往往去爲盜

吉士首閱武郭南令下士卒有序會年饑錄餓者七十人完廨舍垣墻使家人與處詢羣盜出沒所在多得其實乃申明乘墉保甲團練之法躬詣河北都行荒政日暮留宿陶穴詰朝相度蹊徑通塞村砦近遠知最險者三坐崖東西兩葫蘆川繞其下塞葫蘆口則軍不得進據三坐崖則軍不克登遂默識之而還十年十月朔上官檄進勦吉士令葺靖安堡期以月幾望兵進屯先七日置酒城隅却月湖張樂於舫許老稚夾岸縱觀越宿復要客剪燭賦詩密誠司夜者從更籌於子刻打五鼓吉士起送客出郭則守備姚順等已先受約統步騎兵四百集南關外疾行四十里饗士卒水泉灘分三隊並進入兩葫蘆川據三坐崖賊鳥獸散散復合且戰且奔官軍分搜巢窟獲魁渠二十二



人餘或降或自剄召山民不作賊者三十七家賚以羊酒其素不當夫徭者千四百三十家編其籍入都圖入山旬有六日交山寇平又修圖經立倉廩定軍營課民種柳鑿山通龍門渠以溉田遂力請復南堡村木厰秣善馬於驛巡撫上其狀入爲戶部山西司主事後選戶科給事中卒趙良璧奉天開原人康熙八年以廕生知徐溝縣徐彈丸邑當孔道供億煩重良璧送迎餽餉胥謝絕涖政五年寬嚴並濟以清源盜案呈誤去後歷西安府同知猶念徐溝科第少札召紳士斥四百金俾築文峰邑東南云

孫閔達江南通州人康熙十三年以進士知太原縣性簡潔食不重味政先慈恕不輕敲扑犯者至死胥感頌不輟立義學刊省身錄功過格感應篇梗贊興起乙卯同考鄉試

拔魏學誠象樞子也後以病歸行李一如始至

儲方慶江南宜興人康熙十四年以進士知清源縣時軍興辦供億又山水數漲爲城害歲修白石堰禦之吏緣爲姦利民滋擾方慶性介潔糗糧芻藁之費胥假貸以辦不徵民間一錢趙成田茂諸逋賦暨貧不能娶者多捐俸俸佐之復以民餽運不給因停修堰役步禱白龍神廟明年春山水改道而南去城十里喜曰吾可保清邑數十年無患矣乃移建白龍神廟以鎮之月集諸生較藝後多成名時諸上官爭爲引重問入幕賓姓名而事胥手裁幕中故虛無人也三年應博學宏詞試去然猶以城東南隅潞湖水非民利經畫不克展爲憾云

甘國基正藍旗漢軍康熙二十七年任太原府知府性敏果



山西通志 卷八十八  
綜練庶務上官倚之如右手讞獄以片言折之情偽如  
指掌市黠衙蠹胥斂迹而不專以擊斷爲能嘗捐俸覓乳  
媪育嬰兒失養者又設義塚瘞枯骨在任七年賢聲懋著  
唐廉四川人康熙三十六年以舉人知陽曲縣性儉樸衣布  
衣不曲事上官歲時儀節胥絕尋中吏議罷歸未幾再起  
知縣事卒不少屈接紳士以禮而請託則堅拒弗許民以  
事至引至堂前語亶亶不厭而執法者按治不少貸馭吏  
嚴而有恩前後蒞任凡七年解組時敝車羸馬行李蕭然  
人皆謂適符其名云

山西通志卷第八十八



